

## **CONVENIO ENTRE A CONSELLERÍA DE CULTURA, EDUCACIÓN, FORMACIÓN PROFESIONAL E UNIVERSIDADES E A ASOCIACIÓN CULTURAL ÉVAME-OROZA PARA A REALIZACIÓN ACTIVIDADES CULTURAI**

Dunha parte, Román Rodríguez González, na súa condición de conselleiro de Cultura, Educación, Formación Profesional e Universidades, en virtude do seu nomeamento mediante o Decreto 60/2022, do 15 de maio, no exercicio das atribucións que lle confire o artigo 34 da Lei 1/1983, do 22 de febreiro, reguladora da Xunta e a súa Presidencia.

Doutra, Javier Romero González, con NIF 36068145M, na súa calidade de presidente da Asociación Cultural Évame-Oroza, con CIF G10971679, actuando en nome e representación da entidade, segundo as facultades que lle outorgan os seus estatutos, tal como figuran nos arquivos desta consellería.

Interveñen en función dos seus respectivos cargos e no exercicio das súas facultades que para convir no nome das entidades que representan teñen conferidas, e,

### **EXPOÑEN:**

Que as dúas entidades son conscientes da necesidade de actuacións de carácter sociocultural que permitan unha adecuada oferta, co obxecto de satisfacer as necesidades en materia cultural.

Que a Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española. Dentro dese ámbito competencial, a Consellería de Cultura, Educación, Formación Profesional e Universidades vén desenvolvendo dende anos atrás unha serie de actuacións encamiñadas á divulgación, información e promoción da cultura, para achegar o máximo posible o noso patrimonio cultural á sociedade en xeral.

A Consellería de Cultura, Educación, Formación Profesional e Universidades quere acometer a realización de actividades de promoción e divulgación do patrimonio e da cultura galega; mediante a programación de actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.



A Asociación Cultural Évame Oroza ten como fins:

- Custodiar e promover o legado literario do poeta Carlos Oroza, en canto a Patrimonio Cultural.
- A organización dun premio literario anual de poesía en lingua española
- A organización dun premio literario anual de poesía en lingua galega
- A organización dun premio anual a mellor iniciativa musical de apoio a literatura
- A organización de actos culturais de todo tipo, literario ou non literarios.

Para levar a cabo os seus fins, a asociación poderá organizar as seguintes actividades:

- Convocar os certames
- Elixir e nomear os compoñentes dos xurados
- Busca de patrocinio
- Celebrar os actos públicos de entrega dos premios
- Cantas outras actividades sexan precisas para a consecución dos fins da asociación

A asociación Cultural Évame Oroza, creada en Vigo recentemente para manter viva a obra e a figura do poeta Carlos Oroza(1923-2015), organizou para este 2023, ano no que se celebra o centenario do seu nacemento, unha serie de eventos e actos orientados a facer visible o labor poético e a personalidade dun dos escritores máis inxustamente invisibilizados, pero máis influentes de Galicia. Malia ter empregado o castelán na súa escrita, a súa pegada entre poetas galegas e galegos e artistas de toda índole convérteno nunha das figuras máis destacadas do país. Por este motivo, a convocatoria destes actos é tan importante e o seu peso na cultura do noso país é fundamental, tratándose, sen dúbida, do mellor poeta oral do século XX.

De todas as actividades que a asociación leva realizado e das que ten en proxecto este ano 2023, as máis significativas son: Premios Carlos Oroza, Libro Oroza 100, Exposición Itinerante Carlos Oroza e Web Evame.es.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

## CLÁUSULAS

### PRIMEIRA.- Obxecto e actuacións



É obxecto deste convenio establecer as condicións polas que se rexerá a colaboración entre a Consellería de Cultura, Educación, Formación Profesional e Universidades e a Asociación Cultural Évame Oroza para a realización das actividades culturais: Premios Carlos Oroza, Libro Oroza 100, Exposición Itinerante Carlos Oroza e Web Evame.es.

### PREMIOS CARLOS OROZA

A convocatoria dos Premios Carlos Oroza constan de dúas vertentes diferentes pero complementarias.

Dunha banda está o Premio Internacional de Poesía Carlos Oroza, certame xa en marcha, que conta con dúas categorías: unha para aqueles poemarios presentados en lingua galega e outra para os presentados en lingua castelá. O Premio Internacional de Poesía Carlos Oroza ten un carácter bienal e unha dotación de 6.000 euros por categoría, o que o sitúa ao nivel doutros grandes premios do sistema literario en lingua galega e en lingua castelá. É preciso subliñar que a creación dun premio que leva o nome do poeta que o inspira é unha das maneira máis eficaces e merecidas de recoñecer e espallar o legado dunha figura literaria.

Alén da dotación económica, o gañador ou gañadora recibirá unha pequena figura en bronce de Carlos Oroza que realizará a artista Cuqui Piñeiro na súa fundición, sendo este galardón unha peza de artista única e destacable pola súa feitura e maestría.

Doutra banda, encadrado dentro dos Premios Carlos Oroza, atópase tamén o recoñecemento á Mellor Iniciativa Musical de Divulgación da Poesía. Con el preténdese distinguir a artistas que pola súa traxectoria, implicación, traballos concretos ou carreiras profesionais destaquen no ámbito da música por poñer en valor a poesía en diálogo con ela.

Coa creación deste premio preténdese tamén sinalar a estreita relación que sempre existiu entre a poesía de Carlos Oroza e diversos proxectos musicais, así como subliñar a importancia daqueles proxectos que, xuntando ambas linguaxes, procuran novos públicos para a poesía.

O premio é un recoñecemento que se outorga sen concurso, por unanimidade das persoas que participan na asociación. Este é un premio de carácter internacional no que se pode recoñecer o labor de artistas de calquera procedencia ou nacionalidade. O galardón consiste nunha peza de arte realizada por unha artista galega ou galego de recoñecido prestixio.

### LIBRO OROZA 100

O libro ***Oroza 100***: un libro–homenaxe que contén elementos visuais e textuais.



Para axudar ao coñecemento da súa poesía, do seu pensamento e da súa biografía nace este proxecto consistente na edición dun libro onde, a través de imaxes, textos de diversas creadoras e creadores, amigas e amigos e outras personalidades da cultura unidos a textos de entrevistas e poemas de Oroza se intenta debuxar o peso real que tivo a súa obra e a súa filosofía de vida. O libro pretende ser unha visión poliédrica que axude a visibilizar a súa aportación á poesía e a manter viva a súa memoria.

En canto aos elementos visuais, a publicación recollerá fotografías históricas do poeta, deseños feitos por el mesmo e outros deseños ou traballos gráficos elaborados por artistas próximos a el, tanto aqueles cos que colaborou en vida coma outros sobre os que influíu.

No referido aos elementos textuais, **Oroza 100**, recollerá as aportacións de 100 artistas e personalidades da cultura de diversos ámbitos e xeracións, tanto homes como mulleres, que reflexionan, nun breve texto, sobre a figura de Oroza, atendendo a aspectos que poden ter que ver coa súa experiencia persoal no trato co poeta, á influencia da súa obra ou á transcendencia da súa personalidade.

Esta publicación nace da necesidade de aportar material bibliográfico, ata agora moi escaso, relacionado co poeta, contribuíndo así á consolidación da súa figura no sistema literario ao tempo que se amplía a súa presenza na sociedade, atendendo tanto á súa obra como creador como á súa figura. Trátase dun libro especial: un achegamento rigoroso pero tamén accesible e entretido á figura de Oroza e á súa obra.

#### EXPOSICIÓN ITINERANTE CARLOS OROZA

Exposición de orientación didáctica cun obxectivo divulgativo arredor dunha cronobiografía do poeta que convida á lectura de versos de poemas destacados ilustrados con fotografías. A mostra visitará distintas cidades e vilas galegas, entre as que se destaca Vigo (onde xa está instalada e permanecerá ata mediados de xuño). Pontevedra, Lugo, Viveiro, Santiago, A Coruña, Ourense e O Courel.

En cada unha destas localizacións está prevista a realización dun acto inaugural consistente nun acto cultural que combine o escénico ou musical cunha visita guiada.

#### WEB EVAME.ES

Finalmente, a asociación centra os seus esforzos na difusión da obra, biografía e figura de Carlos Oroza e, para iso fai un especial esforzo no labor comunicativo a través das redes sociais e da páxina web.



A web da asociación leva xa meses en funcionamento e nela poden atoparse seccións con contidos biográficos, fotografías históricas, audios coa voz do poeta, textos e outros contidos de interesa, así como a axenda de actos da asociación e os eventos máis importantes, como os premios.

A importancia desta páxina web reside en que se están a dixitalizar moita da documentación histórica que diferentes persoas que trataron ao poeta fan chegar: fotografías, vídeos, orixinais manuscritos, debuxos realizados por Carlos ou por outros artistas dedicados a el... unha cantidade enorme de material que se poderá ver e consultar na web ao tempo que se garda nun arquivo dixital e físico que atesora a asociación.

Todo este material, por veces inédito, serve para completar algunhas das lagoas que se teñen sobre a biografía do autor, así como para dar á coñecer ao público xeral a súa obra. Que Carlos Oroza teña referencias nas redes é tamén unha maneira de visibilizar a súa figura e convertelo no referente que para moitas persoas xa era.

#### Orzamento:

Libro Oroza 100	8.000,00 € IVE incluído
Exposición itinerante Carlos Oroza	21.415,68 € IVE incluído
Premios Carlos Oroza	14.807,15 € IVE incluído
Plan de presenza en redes e web	5.759,60 € IVE incluído
Gastos de xestión (salarios, subministracións e servizos externos de comunicación e difusión e gastos de produción e organización de actividades	15.000,00 € IVE incluído
<b>TOTAL</b>	<b>64.982,43 € IVE incluído</b>

De acordo co artigo 26 da Lei de Subvencións non é posible promover a concorrência pública para a realización destas actividades, por canto se trata de actividades únicas e de especiais características. Por todo o que representan estas actuacións, é a Asociación Cultural Évame Oroza a que posúe a especificidade como beneficiaria así como a da actuación subvencionada e o interese social da axuda concedida. A Asociación Cultural Évame Oroza, creada en Vigo recentemente para manter viva a obra e a figura do poeta Carlos Oroza(1923-2015), organizou para este 2023, ano no que se celebra o centenario do seu nacemento, unha serie de eventos e actos orientados a facer visible o labor poético e a personalidade dun dos escritores máis inxustamente invisibilizados, pero máis influentes de Galicia. Malia ter empregado o castelán na súa escrita, a súa pegada entre poetas galegas e galegos e artistas de toda índole convérteno nunha das figuras máis destacadas do país. Por este motivo,



a convocatoria destes actos é tan importante e o seu peso na cultura do noso país é fundamental, tratándose, sen dúbida, do mellor poeta oral do século XX.

Así mesmo e de acordo coa planificación estratéxica realizada pola Dirección Xeral de Cultura, para o ano 2023, e dada a especificidade e exclusividade das actividades a realizar baseadas en criterios obxectivos, a sinatura deste convenio encádrase dentro dos previstos nese plan.

### **SEGUNDA.- Obrigas da Asociación Cultural Évame Oroza**

A Asociación Cultural Évame Oroza comprométese, pola súa parte, a facer constar en toda a publicidade que xeren estas actividades –tanto impresa como audiovisual- a colaboración Xunta de Galicia, para o que utilizará a normativa da imaxe corporativa da Xunta de Galicia. Así mesmo comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, en canto non se opoña á lexislación anterior. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

A Asociación deberá dar cumprimento das obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

A Asociación ten a obriga de prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

A Asociación deberá presentar certificacións acreditativas do cumprimento das obrigas tributarias, coa Seguridade Social e de non ter pendente de pagamento débedas coa Administración pública da comunidade autónoma.

A sinatura deste convenio implica, de ser o caso, a autorización á Consellería de Cultura, Educación, Formación Profesional e Universidades para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, de acordo co establecido no Regulamento (UE) 2016/679 de protección de datos, na Lei Orgánica 3/2018, de 5 de decembro, de protección de datos persoais e garantía dos dereitos dixitais, disposición adicional cuarta da Lei 40/1998, de 9 de decembro, do imposto sobre a renda das persoas físicas e outras normas tributarias, e demais disposicións de aplicación.



De acordo co artigo 10 da Lei 9/2007, do 13 de xuño, a beneficiaria deberá presentar unha declaración responsable de non estar incurso en ningunha das prohibicións para obter a condición de beneficiaria. Esta declaración deberá presentarse antes da sinatura do convenio.

A Asociación comprométese a destinar os fondos percibidos ao obxecto concreto para o que foron concedidos. A Consellería de Cultura, Educación, Formación Profesional e Universidades poderá comprobar, cando o considere pertinente, a execución das actividades obxecto deste convenio.

### **TERCEIRA.- Financiamento e compatibilidade**

A Consellería de Cultura, Educación, Formación Profesional e Universidades comprométese a aboar a cantidade de 53.000 €, con cargo ás seguintes aplicacións orzamentarias:

10.04.432B.481.2(proxecto 2015 00372) : a cantidade de 15.000 €

10.04.432B.781.1 (proxecto 2015 00372): a cantidade de 38.000 €

No caso de que a xustificación dos gastos sexa inferior ao importe do convenio fixado na cláusula primeira (64.982,43 €: 15.000 € no capítulo 4 e 49.982,43 € no capítulo 7), a achega da Consellería de Cultura, Educación, Formación Profesional e Universidades diminuírase proporcionalmente.

Conforme o disposto no artigo 40.1.d) do Regulamento da Lei de subvencións de Galicia, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea e/ou organismos internacionais.

De conformidade co artigo 17.3 da Lei 9/2007, do 13 de xuño, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custe da actividade subvencionada. En caso de superar procederá o reintegro do exceso obtido sobre o custo da actividade subvencionada así como a esixencia do xuro de demora correspondente.

### **CUARTA.- Xustificación dos gastos e pagamento**

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007. A data tope de presentación da documentación xustificativa da actividade e, se fora o caso, da xustificación dos gastos que restasen por aboar ata acadar o 100% da contía concedida é o 30 de novembro de 2023.



A documentación requirida na fase xustificativa presentarase electronicamente na Carpeta do cidadán da persoa solicitante/representante, <https://sede.xunta.es/carpeta-do-cidadan>.

A Asociación presentará electronicamente a xustificación da subvención, coa data límite establecida e incluírá a seguinte documentación:

- Unha memoria de actuación xustificativa do cumprimento das condicións obxecto deste convenio, con indicación das actividades realizadas e dos resultados obtidos. Nesta memoria deberase indicar o número de actividades realizadas e o impacto desta oferta cultural entre o público (público asistente)
- Unha memoria económica xustificativa do custo das actividades realizadas que conterá:
  - ✓ Unha relación clasificada dos gastos e investimentos da actividade, con identificación do acredor, do importe, data de emisión e data de pagamento.
  - ✓ As facturas ou documentos de valor probatorio equivalente incorporados na relación a que se fai referencia no parágrafo anterior e a documentación acreditativa do pagamento.
- Unha relación detallada, se é o caso, doutros ingresos ou subvencións que financiasen a actividade subvencionada con indicación do importe e a súa procedencia. No caso de non ter solicitado e/ou non ter recibido outros ingresos ou subvencións que financiasen a actividade subvencionada, deberán de presentar unha declaración responsable neste sentido.
- Os tributos son gastos subvencionables cando o beneficiario da subvención os abone efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación, nin os impostos persoais sobre a renda. Na xustificación deberase indicar si son ou non susceptibles de recuperación.

A presentación desta información é requisito imprescindible para a tramitación do pagamento, devolvendo toda a xustificación que non o cumpra.

En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia. Cando o importe do gasto subvencionable supere as contías establecidas na Lei de contratos do sector público, para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, a prestación do servizo ou a entrega do ben, salvo que polas súas especiais



características non exista no mercado suficiente número de entidades que as realicen, presten ou subministren ou salvo que o gasto se realizara con anterioridade á solicitude da subvención.

#### Subcontratación:

Poderán ser obxecto de subcontratación, total ou parcial, as actividades subvencionadas a través deste convenio, tendo en conta o disposto nesta cláusula e de acordo co establecido no artigo 27 da Lei 9/2007, do 13 de xuño, de subvencións de Galicia. En todo caso queda fóra da subcontratación aqueles gastos nos que teña que incorrer a entidade para a realización por si mesma da actividade subvencionada.

De conformidade co previsto na Lei 9/2007, de subvencións de Galicia, para efectos desta xustificación consideraranse os gastos realizados durante o ano 2023, dende o 1 de xaneiro ata a data tope de xustificación da axuda, que respondan á natureza da actividade subvencionada.

No caso de que a Asociación non xustifique ou a xustificación sexa insuficiente, procederá o reintegro das cantidades percibidas e a esixencia do xuro de demora correspondente dende o momento do pagamento de subvencións ata a data na que se acorde a procedencia do reintegro.

Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas.

#### **QUINTA.- Pagamentos anticipados e á conta**

No caso da achega con cargo á aplicación 10.04.432B.481.2, 15.000 €, a asociación poderá solicitar pagos anticipados de ata o 80% como máximo, segundo o disposto no artigo 63.1.1 do Regulamento de subvencións de Galicia; neste caso o importe máximo que poderán solicitar será de 12.000 €.

No caso da achega con cargo á aplicación orzamentaria 10.04.432B.781.1, 38.000 €, a asociación poderá solicitar pagos anticipados de ata 18.000 € como máximo, de acordo co disposto no artigo 63.1.2 do Regulamento de subvencións.

No caso de que a asociación solicite pagamentos anticipados deberá presentar unha memoria xustificativa e económica na que se recollan as actuacións que ten previsto realizar co custo das actividades.

A Asociación tamén poderá solicitar pagos a conta, artigo 62 do Regulamento de Subvencións, que responderán ao ritmo de execución das actividades subvencionadas aboándose pola contía equivalente á xustificación presentada.



O importe conxunto dos pagos a conta e dos pagos anticipados que se concedan non poderá exceder de 18.000 €.

O artigo 65.1 do Regulamento de subvencións de Galicia establece que os beneficiarios están obrigados á constitución de garantías cando se prevexa a posibilidade de realizar pagamentos á conta ou anticipados; o apartado 4.f) do devandito artigo exonera de constitución de garantía entre outros aos beneficiarios de subvencións con cargo aos créditos orzamentarios correspondentes ao capítulo IV, destinadas a familias e institucións sen fins de lucro; o apartado 4.i) do devandito artigo exonera de constitución de garantía aos beneficiarios das subvencións concedidas cando os pagamentos non superen os 18.000 €.

#### **SEXTA.- Comisión de Seguimento**

Créase unha comisión mixta de seguimento para aclarar as dúbidas derivadas da interpretación e execución deste convenio, formada polo director xeral de Cultura, da Consellería de Cultura, Educación, Formación Profesional e Universidades, e polo presidente da Asociación Cultural Évame Oroza.

#### **SÉTIMA.- Causas de resolución e modificación do convenio**

O incumprimento de calquera das cláusulas deste convenio constituirá causa suficiente para a súa rescisión, e así mesmo procederá o reintegro da subvención cando concorra algunha das causas previstas no artigo 33 da Lei 9/2007, de 13 de xuño, de subvencións de Galicia.

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Segundo o disposto no artigo 31.4 da Lei 14/2013, do 26 de decembro, de racionalización do sector público autonómico:

*"Os convenios subscritos pola Administración xeral da Comunidade e Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostenibilidade e financeira.*

*Ditas modificacións terán por obxecto a redución do volume das obrigas ou a ampliación do seu prazo de execución."*

#### **OITAVA.- Publicidade e rexistro do convenio**

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.



Así mesmo, a Asociación Cultural Évame Oroza acepta e consinte a remisión do convenio, logo da súa sinatura, ao Rexistro de Convenios da Xunta de Galicia.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no decreto 126/2006, do 20 de xullo e no decreto 132/2006, do 27 de xullo.

#### **NOVENA- Protección de datos de carácter persoal e garantía dos dereitos dixitais**

As partes asinantes comprométese a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e, a súa protección fronte alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

#### **DÉCIMA.- Administración dixital**

As partes asinantes deste convenio respectarán cantas esixencias establece a Lei 4/2019, do 17 de xullo, de administración dixital de Galicia (DOG 26 de xullo de 2019), que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia, pola Administración xeral e polas entidades instrumentais e, tamén, será aplicable á cidadanía que ten o deber de utilizar os servizos públicos dixitais que se poñan a súa disposición de xeito adecuado, co respecto das normas de uso, xerais ou específicas, que se establezan



para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicas de que sexan lexítimos titulares, usar a información dispoñible conforme a política de privacidade publicada e respectar a normativa en materia de protección de datos de carácter persoal (artigos 2 a) e b) e 7 apartados 1 e 2 respectivamente da citada lei).

#### **DÉCIMO PRIMEIRA.- Xurisdición**

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

Será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

#### **DÉCIMO SEGUNDA.- Notificación electrónica**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

#### **DÉCIMO TERCEIRA.- Vixencia**

O período de vixencia deste convenio será dende a súa sinatura e ata o 31 de decembro de 2023, sen prexuízo de que se subvencionen as actividades realizadas dende o 1 de xaneiro de 2023.

Ao estaren as dúas partes conformes co pactado, asinan telematicamente este convenio.





XUNTA  
DE GALICIA

O conselleiro de Cultura, Educación,  
Formación Profesional e Universidades

O presidente da Asociación Cultural  
Évame Oroza

Román Rodríguez González

Javier Romero González

